




Broj: 03/1-50-14-7-42/18
Sarajevo, 28.2.2018.



ZAPISNIK

42. sjednice Zajedničke komisije za odbranu i sigurnost BiH, održane 6.2.2018., od 14 do 15 sati

Sjednicu Zajedničke komisije za odbranu i sigurnost BiH sazvaio je predsjedavajući Zajedničke komisije Sifet Podžić.

Sjednici su prisustvovali sljedeći članovi Zajedničke komisije: Sifet Podžić, Borislav Bojić, Borjana Krišto, Mario Karamatić, Hanka Vajzović, Bariša Čolak i Šemsudin Mehmedović.

Odsustvo sa sjednice opravdali su: Ognjen Tadić, Hazim Rančić, Darko Babalj i Fahrudin Radončić, a odsustvovala je i Dušanka Majkić.

Sjednici su prisustvovali i gosti, kao i predstavnici službi Parlamentarne skupštine BiH:

- Dragan Mektić, ministar sigurnosti BiH,
- Enes Obralića, prvi zamjenik predsjednice Nezavisnog odbora,
- Boško Šiljegović, parlamentarni vojni povjerenik BiH,
- Sanja Čatibović iz OSCE-a,
- Ivana Lovrić, sekretarka Nezavisnog odbora,
- Aida Kovač, FENA,
- Nea Manjura, Dnevni avaz,
- Snežana Samardžija, SRNA,
- Svetlana Miović, PSBiH,
- Zoran Brkić iz Sektora za odnose sa javnošću PSBiH,
- Ljiljana Milićević, sekretarka, i Željko Grubešić, stručni savjetnik u Zajedničkoj komisiji za odbranu i sigurnost BiH.

Predsjedavajući Zajedničke komisije **Sifet Podžić** upoznao je prije rasprave o dnevnom redu članove Zajedničke komisije s dopisom ministra sigurnosti u vezi sa zaključkom s prethodne sjednice kada je Komisija obavezala Ministarstvo sigurnosti da dostavi informacije o eventualnom postojanju i djelovanju paravojnih formacija. Ministar je Komisiju svojim dopisom obavijestio da su od nadležnih agencija zatražene informacije, te da će po zaprimanju one biti objedinjene i dostavljene Komisiji. Ovo obavještenje dostavljeno je uz materijale za sjednicu svim članovima Komisije.

Potom je upoznao članove Komisije s predloženim dnevnim redom.

Komisija se izjasnila o dnevnom redu 42. sjednice koji je predložio predsjedavajući Komisije Sifet Podžić, te je, sa sedam glasova „za“, usvojen sljedeći

DNEVNI RED

1. Usvajanje Zapisnika 40. sjednice Zajedničke komisije za odbranu i sigurnost BiH;
2. Usvajanje Zapisnika 41. sjednice Zajedničke komisije za odbranu i sigurnost BiH;
3. Prijedlog zakona o izmjeni i dopunama Zakona o nezavisnim i nadzornim tijelima policijske strukture BiH – prva faza (predlagač: Vijeće ministara BiH, akt broj: 01,02-02-1-1752/17, od 14.11.2017.);
4. Razmatranje prijedloga kandidata za poziciju parlamentarnog vojnog povjerenika BiH (materijali: prijedlog članova Zajedničke komisije: B. Bojića, O. Tadića i D. Babalja, akt broj: 06/3-03-2523/17, od 17.1.2018.; prijedlog Kluba poslanika SNSD-a, akt broj: 03/1-03-2523/17, od 19.1.2018., i prijedlog Kluba srpskog naroda u DNPSBiH – akt broj: 06/3-03-2523/17, od 25.1.2018.);
5. Razmatranje Izvještaja o radu Nezavisnog odbora Parlamentarne skupštine BiH kao nezavisnog tijela policijske strukture Bosne i Hercegovine za 2017. godinu (materijal Nezavisnog odbora);
6. Razmatranje Plana rada Nezavisnog odbora Parlamentarne skupštine BiH kao nezavisnog tijela policijske strukture Bosne i Hercegovine za 2018. godinu (materijal Nezavisnog odbora);
7. Informacija o održanoj radionici za članove Zajedničke komisije za odbranu i sigurnost BiH u sjedištu Mađunarodne agencije za atomsku energiju - IAEA, Beč, 17. i 18.10.2017. (materijal Zajedničke komisije);
8. Tekuća pitanja.

Ad.1. Usvajanje Zapisnika 40. sjednice Zajedničke komisije za odbranu i sigurnost BiH

Kako o Prijedlogu zapisnika nije bilo rasprave, članovi Zajedničke komisije izjasnili su se o Zapisniku 40. sjednice Zajedničke komisije za odbranu i sigurnost BiH.

Zajednička komisija je, sa sedam glasova „za“, usvojila Zapisnik 40. sjednice.

Ad.2. Usvajanje Zapisnika 41. sjednice Zajedničke komisije za odbranu i sigurnost BiH

Kako o Prijedlogu zapisnika nije bilo rasprave, članovi Zajedničke komisije izjasnili su se o Zapisniku 41. sjednice Zajedničke komisije za odbranu i sigurnost BiH.

Zajednička komisija je, sa sedam glasova „za“, usvojila Zapisnik 41. sjednice.

Ad.3. Prijedlog zakona o izmjeni i dopunama Zakona o nezavisnim i nadzornim tijelima policijske strukture Bosne i Hercegovine - prva faza (predlagač: Vijeće ministara BiH)

Predsjedavajući Podžić je u uvodnom dijelu podsjetio na hronologiju razmatranja Prijedloga zakona, napominjući da je Vijeće ministra BiH 14.11.2017. dostavilo Parlamentarnoj skupštini BiH Prijedlog zakona o izmjeni i dopunama Zakona o nezavisnim i nadzornim tijelima policijske strukture Bosne i Hercegovine na razmatranje po redovnom zakonodavnom postupku.

Komisija je, na osnovu člana 109. Poslovnika Predstavničkog doma i člana 100. Poslovnika Doma naroda Parlamentarne skupštine BiH, na 41. sjednici, održanoj 15.1.2018., razmatrala Prijedlog zakona u prvoj fazi - rasprava o principima i nije prihvatila principe Prijedloga zakona, te je domovima Parlamentarne skupštine BiH dostavila negativno mišljenje o Prijedlogu zakona.

Predstavnički dom Parlamentarne skupštine BiH na 56. sjednici, održanoj 31.1.2018., nije usvojio negativno mišljenje Komisije o principima Prijedloga zakona te je, u skladu s članom 113. stav (3) Poslovnika Predstavničkog doma, zadužio Komisiju da izradi novo mišljenje o Prijedlogu zakona.

Komisija na 42. sjednici ponovo razmatra Prijedlog zakona u prvoj fazi - rasprava o principima, i utvrđuje konačan prijedlog mišljenja.

Dragan Mektić, ministar sigurnosti BiH, u ime predlagača Zakona obrazložio je suštinu Prijedloga zakona, ukazujući na potrebu zastupljenosti predstavnika Direkcije za koordinaciju policijskih službenika BiH u Odboru za žalbe policijskih službenika.

Nakon rasprave, *Zajednička komisija je, s pet glasova „za“, jednim glasom „protiv“ i jednim glasom „suzdržan“, prihvatila principe Prijedloga zakona o izmjeni i dopunama Zakona o nezavisnim i nadzornim tijelima policijske strukture Bosne i Hercegovine.*

Ad.4. Razmatranje prijedloga kandidata za poziciju parlamentarnog vojnog povjerenika BiH

Predsjedavajući Zajedničke komisije upoznao je prisutne da su, na osnovu člana 9. stav 2. Zakona o parlamentarnom vojnom povjereniku BiH („Službeni glasnik BiH“, broj 51/09) i

provedene procedure, kandidata za vojnog povjerenika predložili ovlašteni predlagači: članovi Zajedničke komisije za odbranu i sigurnost BiH – Borislav Bojić, Ognjen Tadić i Darko Babalj, Klub delegata srpskog naroda i Klub poslanika SNSD-a u Predstavničkom domu. Svi ovlašteni predlagači predložili su Boška Šiljegovića za vojnog povjerenika.

Naglasio je da je Boško Šiljegović prvi parlamentarni vojni povjerenik koji je od 16.9.2009. godine (kada je položio zakletvu pred Predstavničkim domom Parlamentarne skupštine BiH) u svom dosadašnjem radu dao puni doprinos u izgradnji ove institucije te zaštiti ljudskih prava pripadnika Oružanih snaga BiH. Na prijedlog Zajedničke komisije za odbranu i sigurnost BiH, na funkciju parlamentarnog vojnog povjerenika BiH Parlamentarna skupština BiH imenovala ga je 2012. na mandat 2012.-2017. Biografija gosp. Šiljegovića dostavljena je svim članovima Komisije, a gosp. Šiljegović je Komisiji, također, dostavio dokaze o ispunjavanju uslova propisanih u članu 10. Zakona o parlamentarnom vojnom povjereniku BiH.

Na osnovu člana 9. stav 1. Zakona o parlamentarnom vojnom povjereniku BiH, Zajednička komisija za odbranu i sigurnost BiH predlaže vojnog povjerenika kojeg bira Parlamentarna skupština BiH.

Borjana Krišto pohvalila je rad gosp. Šiljegovića u prethodnom periodu, podržala izbor i naglasila da će Klub HDZ-a u Predstavničkom domu, kao i Klub delegata hrvatskog naroda u Domu naroda podržati izbor Boška Šiljegovića na mjesto parlamentarnog vojnog povjerenika BiH.

Zajednička komisija za odbranu i sigurnost BiH se potom izjasnila i jednoglasno, sa sedam glasova „za“, bez glasova „protiv“ i „suzdržan“, usvojila da se Parlamentarnoj skupštini BiH uputi prijedlog da se Boško Šiljegović izabere za parlamentarnog vojnog povjerenika BiH.

Ad.5. Razmatranje Izvještaja o radu Nezavisnog odbora Parlamentarne skupštine BiH kao nezavisnog tijela policijske strukture Bosne i Hercegovine za 2017. godinu (materijal Nezavisnog odbora)

Sifet Podžić, predsjedavajući Zajedničke komisije, naglasio je da je Nezavisni odbor kao nezavisno tijelo policijske strukture BiH, u skladu s članom 7. stav (1) tač. b) i e) Zakona o nezavisnim tijelima policijske strukture u BiH („Službeni glasnik BiH“, broj 36/08), usvojio i 25.1.2018. dostavio u parlamentarnu proceduru Izvještaj o radu za 2017. godinu. Zajednička komisija za odbranu i sigurnost BiH, kao nadležna komisija za razmatranje izvještaja, raspravlja o izvještaju o radu Nezavisnog odbora, glasa, te dostavlja svoje mišljenje domovima PSBiH.

Otvarajući raspravu o Izvještaju o radu Nezavisnog odbora za 2017., **Podžić** je ukazao da on smatra da se u izvještaju ne trebaju navoditi detalji o sjednicama Odbora, datumi imenovanja

članova Odbora kao ni nadležnosti Nezavisnog odbora, koje su navedene u poglavljima I. i II. Izvještaja o radu, a koje su višak prema njegovom mišljenju. Pozvao je članove Nezavisnog odbora da svojim budućim radom opravdaju svoj naziv, tj. da budu nezavisni, te da rade u skladu sa svojim nadležnostima.

Enes Obralića, zamjenik predsjednice Nezavisnog odbora, u ime Nezavisnog odbora, informirao je prisutne o dostavljenom izvještaju o radu, te je ukazao da su zbog ostavke Žike Krunića koji je bio predsjednik Nezavisnog odbora u jednom dijelu izvještajnog perioda i izbora nove predsjednice Nezavisnog odbora na ovaj način koncipirali Izvještaj o radu. Ukazao je na činjenicu da su ostvarili dobru saradnju s policijskim agencijama BiH i da su blagovremeno raspisani konkursi za izbor rukovodećih ljudi u policijskim agencijama kojima ističe mandat. Izrazio je uvjerenje da će Nezavisni odbor, kome četverogodišnji mandat ističe u martu 2018. godine, blagovremeno okončati ovaj proces i ministru sigurnosti BiH dostaviti imena kandidata.

Po završetku rasprave o predloženom izvještaju, članovi Komisije izjasnili su se, te su, s pet glasova „za“, jednim glasom „protiv“ i jednim glasom „suzdržan“, usvojili Izvještaj o radu Nezavisnog odbora za 2017.

Ad.6. Razmatranje Plana rada Nezavisnog odbora Parlamentarne skupštine BiH kao nezavisnog tijela policijske strukture Bosne i Hercegovine za 2018. godinu (materijal Nezavisnog odbora)

Sifet Podžić je u uvodnom dijelu naglasio da je Nezavisni odbor kao nezavisno tijelo policijske strukture u BiH (u daljnjem tekstu: Nezavisni odbor), u skladu s članom 7. stav (1) tač. b) i e) Zakona o nezavisnim tijelima policijske strukture u BiH („Službeni glasnik BiH“, broj 36/08), na 39. sjednici, održanoj 13.12.2017., usvojio i 21.12.2017. dostavio u parlamentarnu proceduru Plan rada za 2018. godinu (u daljnjem tekstu: Plan rada).

Zajednička komisija za odbranu i sigurnost BiH, kao nadležna komisija za razmatranje plana rada, obavlja raspravu o ovom aktu i dostavlja domovima mišljenje.

Otvarajući raspravu o Planu rada, Podžić je ukazao da je, prema njegovom mišljenju, Plan rada morao biti precizniji u pogledu planiranih aktivnosti, te da bi trebalo konkretnije, bar po mjesecima, planirati aktivnosti, a ne uopćeno, kako je slučaj u ovom dokumentu.

Nakon rasprave, Zajednička komisija se izjasnila te je, sa šest glasova „za“ i jednim glasom „protiv“, prihvatila Plan rada Nezavisnog odbora za 2018. godinu

Ad.7. Informacija o održanoj radionici za članove Zajedničke komisije za odbranu i sigurnost BiH u sjedištu Mađunarodne agencije za atomsku energiju - IAEA, Beč, 17. i 18.10.2017. (materijal Zajedničke komisije)

S obzirom na to da nije bilo rasprave, Informacija je jednoglasno, sa sedam glasova „za“, primljena k znanju.

Ad.8. Tekuća pitanja

Sifet Podžić upoznao je članove Zajedničke komisije da će se 19.3.2018. u Parlamentarnoj skupštini BiH održati jednodnevni seminar za visoke dužnosnike Bosne i Hercegovine o značaju nuklearne sigurnosti o kome je razgovarano i tokom boravka članova Komisije u Međunarodnoj agenciji za nuklearnu sigurnost u Beču. Mnogobrojne institucije Bosne i Hercegovine, entiteta i drugih nivoa vlasti, sa aspekta njihovih nadležnosti, trebale bi da imaju određene uloge i odgovornosti po pitanju nuklearne sigurnosti u Bosni i Hercegovini, te je skup 19.3.2018. prilika svima u Bosni i Hercegovini koju treba na najbolji mogući način iskoristiti u smislu da se rukovodioci relevantnih institucija i organizacija informiraju o značaju nuklearne sigurnosti tako što će učestvovati u ovom veoma važnom događaju.

Naglasio je da je, s ciljem dobre organizacije spomenutog događaja, prije sjednice Komisije održan sastanak rukovodstva Komisije i rukovodstva Državne regulatorne agencije za radijacijsku i nuklearnu sigurnost BiH radi razmatranja koraka koje je neophodno preduzeti u tom smislu.

Sifet Podžić je potom upoznao članove Komisije s planom aktivnosti Komisije za naredni period, te je najavio da će Komisija do kraja februara posjetiti:

- Direkciju za koordinaciju,
- Ministarstvo sigurnosti BiH - centar 112,
- Službu za poslove sa strancima i Imigracioni centar.


Naglasio je da su planirani i sastanci s komandantima NATO-a i EUFOR-a.

Članovi Komisije će blagovremeno biti obaviješteni o terminima posjeta i pozvao članove Komisije da učestvuju u navedenim aktivnostima.

Sjednica je završena u 15 sati.

Zapisnik sastavila

Ljiljana Milićević



Predsjedavajući Komisije

Sifet Podžić



Dostavljeno:

- naslovu
- a/a